



Komunikadu Imprensa

Tribunál Distritál Dili

25 Abril 2016

Tribunál kondena pena efetiva tinan ida prizaun ba arguidu kazu violénsia doméstika

Iha 20 Abril 2016, Tribunál Distritál Dili prezide julgamentu no imediatamente lee leitura sentensa ba krime ofensa integridade fízika simples ho natureza violénsia doméstika ne'ebé involve arguidu JMG hasoru nia feen, iha Distritu Dili.

Ministériu Públiku akuza katak iha Agostu 2010, lezada ba husu osan ba arguidu atu hola fos maibe arguidu hatan katak nia la kaer lezada nia osan. Lezada hatan ba arguidu katak lezada husu osan ba arguidu tanba nia nu'udar arguidu ninia feen. Arguidu tuku dala ida iha lezada nia ibun no ulun.

Ministériu Públiku akuza arguidu kontra artigu 145 Kódigu Penál kona-ba krime ofensa integridade fízika simples konjuga ho artigu 35 letra (b) Lei Kontra Violénsia Doméstika.

“Tribunál kontinua manifesta ninia sensibilidade no responsabilidade institusionál atu asegura justisa ba vítima violénsia doméstika. Desizaun ne'e hanesan mensajem ida ne'ebé forte ba sociedade katak violénsia doméstika nu'udar krime sériu ne'ebé merese atu hetan kondensaun ne'ebé apropiadu hanesan iha kazu ida-ne'e”, dehan Luis de Oliveira Sampaio, Diretór Ezekutivu JSMP.

JSMP dala-ida tán kongratula juis sira ba desizaun progresivu ida-ne'e, iha kontestu implementasun Lei Kontra Violénsia Doméstika. Liu-liu JSMP orgullu tanba juis sira konsidera hanoin sira ne'ebé durante ne'e JSMP hato'o atu asegura katak kazu violénsia doméstika sira tenke desizaun ida ne'ebé adekuadu.

Desizaun ne'e mós nu'udar avansu ida-tan ba kazu violénsia doméstika, aleinde kazu seluk ne'ebé tribunál kondena ho pena efetiva tinan 2 iha prizaun, iha 8 Abril 2016*.

Durante Abril 2016 nia-laran, Tribunál Distritál Díli hatudu ona mudansa importante liuhosi desizaun ne'ebé sira halo.

Iha julgamentu ba kazu ne'e, tribunál la konsege rona arguidu nia deklarasaun tanba arguidu la marka prezensa. Tuir depoimentu hosi testemuña nu'udar arguidu nia sobriñu deklara katak agora-dadaun arguidu iha hela Baucau no iha ona feen kiik ho oan na'in rua.

Wainhira tribunál konfirma ho lezada relasiona ho faktu sira ne'e, lezada deklara katak durante ne'e arguidu sempre halo violénsia ba nia kuandu sira haksesuk malu kona-ba buat ruma. Testemuña ne'ebé tribunál notifika deklara katak arguidu komete duni krime ne'e.

Iha alegasaun finál, ministériu públiku konsidera faktu hotu-hotu provadu bazeia ba konfirmasaun hosi lezada, depoimentu testemuña, relatóriu médiku ne'ebé hatudu kona-ba lezada ninia-kanek, hamutuk ho fotografia hosi polísia, no deklarasaun arguidu iha autus. Ministériu Públiku mós deklara katak arguidu la kolabora ho tribunal, wainhira tribunál notifika arguidu hodi mai hatan iha tribunál. Tanba ne'e husu ba tribunál aplika pena prizaun efetiva tinan 1 ba arguidu.

Enkuantu defeza husu ba tribunál atu fó pena ne'ebé justu ba arguidu, mesmu arguidu la partisipa iha julgamentu.

Depoisode avalia faktus provadu sira ne'ebé produs durante julgamentu, tribunál imediatamente kondena arguidu ho pena prizaun efetiva tinan 1.

JSMP husu ba ministériu públiku atu asegura katak desizaun ne'e ezejuta tuir desizaun ne'ebé tribunál deside ona. Ministériu Públiku tenke kordena ho autóridade polisiál Distritu Baucau atu ezejuta desizaun ne'e.

* Favor lee JSMP nia Komunikadu Imprensa: Tribunál kondena pena prizaun efetiva tinan 2 ba arguidu kazu violénsia doméstika: JSMP kongratula tribunál ba mudansa progresivu ida-ne'e – 8 Abril 2016, iha JSMP nia website : www.jsmp.tl

Kazu ne'e rejista iha tribunál ho Nuc.1063/10.PDDIL. Julgamentu ne'e prezide hosi juis singular Dra. Ana Paula Fonseca, Ministériu Públiku representa hosi Dr. Reinato Bere Nahak no arguidu hetan defeza hosi Dr. Estaquie Pereira hosi Eskritóriu Defensória Públiku.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org